

沈漢卿 著

重訂溫熱經解



上海科學技術出版社

重刊溫熱經解序

竊思人之所以病者。天地之氣化也。病之所以死所以生者。人身之氣化也。夫熱則氣泄。寒則氣收。怒則氣上。恐則氣下。喜則氣緩。悲則氣消。勞則氣耗。驚則氣亂。思則氣結。病隨氣行。雖千變萬化。要不外乎由表入裏則死。由裏出表則生爾。今醫士皆能治病。而死生莫決。何也。蓋西醫尙實驗。專事剖解以求病。而病源不見。何以決死生。中醫尙氣化。但言天地之氣化。卽理想難憑。何以決死生。夫病有不待剖解而知者。有剖視不得見。而求之人身氣化中有實驗者。如太陽氣化爲寒水。其症有惡風惡寒。少陽氣化爲相火。其症有口苦目眩。此皆人身之氣化。剖視不得見。而其症固實有可驗。不待剖解而知也。我國醫聖張仲景。因漢時醫家。不於人身氣化中求病源。其宗族多被醫誤。故作傷寒雜病論。發明人身氣化之理。以惠後學。不料後學。但知天地之氣化。而不知人身之氣化。誤加註釋。相沿至今。將二千年。不知誤人多少。致令醫界中人。談及傷寒。皆瞠目相視。噤口不言。此家君所以改良古註。闡發病源。而作是書也。書既成。家君因命余讎校更正。先付排印。以質當世之知醫者。是爲序。

沈懋官肖卿氏序於京都延壽寺街醫寓

自序

嘗閱溫病條辨與溫熱經緯而知軒岐長沙之書無人研究何也熙熙攘攘名利是求其所以率爾操觚者皆名利之心迫而出之其於古聖心傳固漠然無所動於中不求經旨妄加註釋晉叔和唐王冰誤解於前各家誤解於後一誤再誤致令神聖相傳之醫學淹沒將二千年迄未發明而吳鞠通王孟英輩復欲撇去傷寒獨開生面而不自知其愚昧集葉氏指南數方以行於世可爲葉氏功臣其實則仲景之罪人也仲景論桂枝湯爲太陽中風之主方太陰病脈浮者爲風寒在表尙宜此湯並未言溫病宜桂枝湯主之而鞠通論溫病開首卽以此方誣聖其不明經旨可知矣仲景論傷寒霍亂宜五苓四逆理中等方而鞠通誤解以治溫病霍亂以熱治溫其不殺人也幾希仲景論少陰病寒傷少陰也而孟英以少陰病爲溫病竊附於仲景門牆以誤後學此胡爲者噫自晉迄今以藥試病於試驗中幸得數方卽稱名醫知其然而不知其所以然病理不明死生莫決此中國醫學所以日趨於腐敗也近時英俊又復喜新厭故競尙西學不知西人之性質西方之風土與中國大不相同其人性情強皮膚密毫毛堅其病生於內故西醫論病皆曰肺炎肝炎腸胃炎治法皆宜內攻也華人性情柔皮膚疏毫毛軟其病生於外故中醫論病皆曰風寒暑濕燥火治法當從外解也習慣不同病情不同治法是以不同人身一氣機耳

熱則氣泄。寒則氣收。收則病入。泄則病出。氣存則生。氣絕則死。病雖千變。氣化則一。此我國醫聖。所以作傷寒雜病論也。西醫不言氣化。專事實驗。輒遇瘟疫。卽倉惶失措。中醫但言天地之氣化。而不求人身之氣化。是以註傷寒家。皆曰少陰之上。熱氣治之。陽明之上。燥氣治之。此非天地氣化乎。天地之少陰爲君火。人身之少陰爲腎水。天地之陽明燥金爲寒燥。人身之陽明燥土爲火燥。仲景論人身。註家說天地。此醫聖經旨。所以迄未發明也。雖不敏。不能將各國醫學。兼收並蓄。竊願發明經旨。俾後學見病知源。詮釋經文。分別溫熱。辨西方瘟疫之名。集平時經驗之方。不揣固陋。類聚成篇。尙祈中西同志。繩愆糾謬。發明人身氣化之病理。庶使古聖心傳。大放光明於世界。

江蘇沈麟漢卿氏作於天津合濟醫院

凡例

一五運六氣。天地之氣化也。傷寒傳經。人身之氣化也。各註家不解虛字。是以多誤。是書於太陽篇中。悟出人身冬令之氣化。於陽明篇中。悟出人身春夏秋三時之氣化。此乃醫聖心傳之要。學者若能於人身氣化中求病理。思過半矣。

一溫病者。天氣爲病也。風自南方來。天氣大溫。民卽病溫。溫邪傷經。當按經施治。病不解。則化爲熱病。人之氣化爲病也。傷寒化熱。伏氣爲溫。皆人之氣化爲病也。分經施治。治法本同。其有不同者。傷寒救陽。溫病救陰。此乃秋冬人氣收藏。春夏人氣外泄之故耳。拙著有傷寒問答。現已脫稿。擬集資付刊。有願出資者。函致天津大費家胡同合濟醫院可也。

一瘟疫者。地氣爲病也。天以陽生陰長。地以陽殺陰藏。故地氣傷人。天氣不降。則地氣上升。如冬令無雪。民病瘟疫。其氣由地下發生。鼠先受病。卽名鼠疫。其氣由口鼻入脾胃。故傳染。法當攻下。化熱以後。人氣爲病。治法與熱病同。西醫不言氣化。以傳染病爲瘟疫。不知天氣爲病。亦能傳染。如風熱咳嗽。其氣由鼻入肺。病氣相傳。西人誤以爲肺疫。名之曰百斯篤。不知風能生蟲。乃氣化之常理。風去蟲自絕。風不去。則久咳成癆。此非地氣爲病。不能殺人。其有不愈者。誤治之過也。

一肝氣病者。人之本氣爲病也。經云怒則氣上。恐則氣下。思則氣結。驚則

氣亂。喜則氣緩。悲則氣消。勞則氣耗。氣行血從。氣順血調。舒其肝氣。調其胃氣。治法與治天氣爲病迥不相同。是篇專論溫熱。不及雜病。故納之於治驗中。另立方藥。如各種咳嗽。五色痢疾等症。各附於後。學者當求之於治驗中。

一 醫聖經文。一字包含數十義。一語耐人數日思。其經義盡在虛字中。與無字處。各註家不但不解虛字。並實字之義。亦不加察。各逞己見。不於原文中求經義。而於原文外。爲之加增字句。使後學盲從。誤盡蒼生。致令傷寒論一書。無人敢讀。變成荒經。是書伏氣溫因病本傷寒。引以爲症。略加新解。而辨症辨脈諸大法。不及備載。不能見病知源。學者欲明病理。當求之於傷寒問答中。

一 仲景於傷寒傳經。發明人身經氣爲病。是書於肝氣病中。發明人身藏氣爲病。復於溫疫中。發明地氣爲病。天氣病宜散。地氣病宜降。人氣病宜和。經氣爲病辨脈症。藏氣爲病分營衛。學者果能於氣化中求治法。則千變萬化。庶有準則矣。

一 咳嗽。肺病也。北方風多。經云。風舍於肺。其人則欬。此症最忌桑白皮。地骨皮。吳鞠通亦嘗言之。今醫士皆喜用桑白皮。致令病人久欬成癆。誤人不淺。此乃不求病源。專事方藥之過也。不知病有陰陽。方有寒熱。一病有數症。一症有數方。必先辨症。而後定方。庶無貽誤。是篇於治驗中。分列方藥。以便研究病情耳。

一痢疾。腸胃病也。經云。腸中熱。便腸垢。卽言此病。此病發於春。風熱內陷也。法當消風。此病發於秋。暑熱內蘊也。法當解暑。今醫士每以爲腸癖。用於朮以止痢。致痢久不止。鄙人嘗見滿人有名連捷者。其父在東泮。作參贊時。患痢。常服於朮。痢至九年而卒。此乃前人誤註腸癖爲痢之故。不知僻字從水。腸癖者。腸間水瀉也。與痢疾適相反。水瀉宜止。其病在脾。脾屬臟。臟不宜瀉。故用於朮以止瀉。痢病在腸胃。腸胃爲腑。腑宜通。不宜塞。若用於朮以止痢。則移熱於脾。腑邪入臟矣。是篇於治驗中。略言治法。以備研究。學者當於病理中求方藥。幸勿專求方藥。而不問病情。不辨脈症也。

溫熱經解

江蘇沈麟漢卿氏著於津門

長男懋宗少卿氏謹按
後學裘詩福吟五重校

大元正紀大論曰。辰戌之紀。太陽司天。氣化運行先天。初之氣。地氣遷。氣乃大溫。草木早榮。民乃厲。溫病乃作。其病身熱頭痛。嘔吐。肌腠瘡瘍。卯酉之紀。陽明司天。氣化運行後天。二之氣。陽乃布。物乃生榮。厲大至。民善暴死。終之氣。陽乃布。候反溫。蟄蟲來見。流水不冰。民乃康平。其病溫。寅申之紀。少陽司天。氣化運行先天。初之氣。地氣遷。風勝乃搖。寒乃去。候乃大溫。草木早榮。寒來不殺。溫病乃起。其病氣拂於上。血溢目赤。咳逆頭痛。血崩脇滿。膚腠中瘡。三之氣。民病熱中。聾瞑。血溢膿瘡。咳嘔軌衄。渴嚏欠。喉痺目赤。善暴死。丑未之紀。太陰司天。氣化運行後天。二之氣。大火正。物承化。民乃和。其病溫厲大行。遠近咸若。濕蒸相搏。雨乃時降。四之氣。畏火臨。溽蒸化。地氣騰。天氣痞隔。寒風曉暮。蒸熱相搏。草木凝煙。濕化不流。則白露不降。以成秋令。民病腠理熱。血暴溢。瘡心腹滿熱。臚脹甚則跗腫。子午之紀。少陰司天。氣化運行先天。三之氣。天正布。大火行。庶類蕃鮮。寒氣時至。民病氣厥。心痛。寒熱更作。咳喘目赤。五之氣。畏火臨。暑反至。陽乃化。萬物乃生。乃長榮。民乃康。其病溫。巳亥之紀。厥陰司天。氣化運行後天。四之氣。溽暑濕熱相搏。爭於左之上。民病黃痺而爲跗腫。終之氣。畏火司令。陽乃

大化。蟄蟲出見。流水不冰。地氣大發。草乃生。人乃舒。其病溫厲。

此論客氣溫病也。其病皆發於君相二火司令之時。其時依年辰。固可按圖而索也。其爲病也。不過身熱。頭痛耳聾。目瞑。鼾。咳喘。嘔渴。喉痺。目赤。瘧。心腹滿熱。臃脹。黃痺。跗腫。血溢。血崩。肌腠瘡瘍。暴死等症而已。與後人所論溫病。始於上焦。由中焦而病及下焦者。迥不相同。何也。病有客氣伏氣之分。是經所論。客氣溫病也。後人所論。伏氣溫病也。伏氣溫病。本冬傷於寒。後人論傷寒由表入裏。溫病自上而下。欲撇去傷寒。獨開生面。以論溫。而不自知其無知妄作。不但於仲景經文。未明經旨。並於內難二經所論溫病。概不符合。此乃無根之學說。不足道也。仲景論傷寒。有寒邪傷經。由經傳經者。有寒邪傷表。由表入裏者。寒邪入裏。先入胸爲胸滿。由心而入心下爲心下痞。由心下而入腹中爲脹滿。其病皆自上而下。伏氣溫病。本冬傷於寒。寒邪伏於骨與肩背之膂筋。至春。病隨氣化。由筋骨而出走肌肉。化爲溫病。由肌肉外達皮毛。發爲熱病。伏寒化溫。自裏出表。乃人身之氣。隨時變化使然。所謂自上而下者。乃人之胃氣。不能使邪氣外解。則邪氣入裏。由上焦而入中焦。甚則深入下焦。其病由衛入營。由表入裏也。夫病之所以由表入裏。自上而下者。皆人之氣化使然。非病能使然。寒邪從毛竅入。溫邪亦從毛竅入。不得以溫邪爲從口鼻入。不能從毛竅入也。何也。人之口鼻呼吸。毛竅亦呼吸。病氣隨呼吸入人身。固無分乎寒與溫也。惟瘟疫傳染。地氣爲病。

穢濁氣味。由口鼻入耳。

難經五十八難曰。溫病之脈。不知何經之動也。各隨其經之所在而取之。此論客氣溫病之脈也。傷寒傳經。客氣溫病不傳經。其病隨君相二火司令之時。溫邪傷經而後發。發於陽明太陰者。爲身熱。欬衄。渴喘喉痺。黃疸跗腫。肌膚瘡瘍。發於少陽厥陰者。爲頭痛目赤。血溢血崩。咳喘脇滿。耳聾目瞑。嘔逆心痛。其病有定時。而無定處。隨其所傷之經。而以針取之。難經專論針法。未言方藥。自仲景發明伊尹湯液。辨明經症。以合方藥。而後人宗之。專事方藥。不求經旨。是以長沙之學未明。而軒岐針灸之法。漸失真傳矣。

客氣溫病治法

辰戌之紀。太陽司天。初之氣。少陽相火司令。溫邪傷人頭痛者。桑菊芩連飲主之。嘔吐者。溫膽湯主之。肌腠瘡瘍者。荆防敗毒湯主之。

桑菊芩連飲方

桑葉 二錢

菊花 三錢

酒芩 八分

川連 八分

川芎 八分

柴胡 八分

甘草 八分

溫膽湯方

竹茹 三錢

枳實 八分

陳皮 八分

姜夏 三錢

茯苓 三錢

甘草 一錢

荆防敗毒湯方

荊芥 八分

防風 八分

銀花 三錢

連翹 八分

酒芩 八分

川貝母 三錢

殭蠶 二錢

陳皮 一錢

薄荷 八分

白芷 八分

甘草 八分

天花粉 二錢

桔梗 八分

黃連 八分

痛者加乳香一錢製沒藥一錢製痛甚者加穿山甲一錢炙皂刺

一錢炙紹酒一盅煎服。

卯酉之紀陽明司天二之氣少陽相火司令民善暴死火邪尅金也終之氣少陰君火司令民病溫法當清肅肺金勿使火刑治以辛涼佐以苦甘桑菊二冬之類

寅申之紀少陽司天初之氣少陰君火司令溫邪傷人血盜者犀角地黃湯主之三黃湯亦主之目赤者桑菊蟬衣飲主之咳逆頭痛者桑杏湯主之咳逆吐血胸中隱痛脈數大者肺癰也犀黃丸主之婦人血崩者芩連瀉青湯主之不止者與蓮房飲血崩過多氣虛下陷者黃芪建中湯主之胸滿者梔子豉湯主之三之氣少陽相火復司令火邪傷人耳聾目瞑者龍膽瀉肝湯主之血盜者三黃湯主之欬嘔者肝火衝肺犯胃也溫膽湯主之嘔者清肺飲主之衄者先與四生丸不愈與承氣湯喉痺者先與清瘟敗毒湯不愈復與除瘟化毒湯舌上無苔者養陰清火湯主之

犀角地黃湯方

犀角尖 一錢 生地 二兩

芍藥 三錢

丹皮 錢半

三黃湯方

大黃 三錢

酒芩 半錢

川連 半錢

桑菊蟬衣飲方

桑葉 一錢

菊花 一錢

蟬退 八分

赤芍 一錢

防風 六分

草決明 一錢

柴胡 六分

川芎 六分

車前子 五分

青箱子 一錢

痛者加川連八分。起星翳者加木賊草一錢。痛甚加龍膽草一錢。

桑杏湯方

桑葉 二錢

前胡 錢半

川連 一錢

川貝母 二錢

去心

杏泥 三錢

菊花 錢半

枳殼 八分

痰中帶血去桑葉。加青黛八分。童便一杯沖。

犀黃丸方

麝香 一分

犀黃 二錢

製乳香 一兩

製沒藥 一兩

右四味。研細。飯糊爲丸。每服一錢。飯後服。甘桔湯送下。

甘桔湯方

甘草 錢半

桔梗 錢半

芩連瀉青湯方

酒芩 錢半

川連 二錢

生地 一兩

阿膠 三錢

青皮 七分

白芍 三錢

甘草 一錢

蓮房飲方

蓮房炭 二枚

阿膠 三錢

棉花子炭 十四粒

黃芪建中湯方

黃芪 六錢

芍藥 二錢

阿膠 三錢

飴糖 五錢

炙甘草 一錢

龍膽瀉肝湯方

龍膽草 錢半

酒芩 一錢

澤瀉 一錢

生地 六錢

北柴胡 三分

車前子 一錢

青皮 七分

黑山梔 一錢

甘草 一錢

清肺飲方

酒芩 一錢

天冬 二錢

甘草 八分

川貝母 一錢

菊花 二錢

黑山梔 一錢

麥冬 二錢

桑葉 一錢

四生丸方

生地 六錢

生艾葉 一錢

鮮荷葉 二錢

生側柏葉 三錢

右四味研末蜜丸每服一錢

承氣湯方

酒軍 三錢

川朴 一錢

枳實 八分

甘草 八分

清瘟敗毒湯方

葛根 二錢

蟬退 一錢

酒芩 一錢

甘草 一錢

殭蠶 二錢

木通 一錢

桑葉 二錢

川貝母 三錢

黑山梔 錢半

山豆根 二錢

青菓 三枚

除瘟化毒湯方

治舌胎黃膩咽喉生蛾腫痛

葛根 二錢

蟬退 一錢

酒芩 一錢

大力子 二錢

殭蠶 二錢

馬勃 錢半

木通 一錢

銀花 三錢

連翹 二錢

石膏 一兩

貝母 三錢

人中黃 五分

土茯苓 三錢

龍膽草 一錢

養陰清火湯方 治舌上無胎者陰虛火旺也

生地 六錢

元參 四錢

麥冬 三錢

薄荷 一錢

咽喉腫者加馬勃錢半竹茹二錢

丑未之紀太陰司天二之氣少陰君火司令濕蒸熱搏法當清解四之氣少陽相火司令民病腠理熱血暴溢三黃湯主之暑濕化瘧但熱不寒者青蒿滑石湯主之心腹滿熱臃脹宜三黃湯附腫者宜防己茯苓湯

青蒿滑石湯方

青蒿 三錢

滑石 三錢

川朴 一錢

建耆 二錢

扁豆衣 錢半

銀花露 五錢

甘草 一錢

知母 二錢

杏仁 二錢

酒芩 八分

通草 八分

荷葉邊 一圓

但頭汗出身無汗者加豆豉三錢葱頭一枚

防己茯苓湯

木防己 一錢

茯苓 一錢

澤瀉 一錢

甘草 八分

蒼朮 八分

滑石 二錢

酒黃柏 八分

猪苓 一錢

子午之紀少陰司天三之氣少陰君火司令寒氣時至民病厥心痛寒熱更作者梔子豆豉湯主之咳喘者杏仁芍連湯主之喘咳氣逆面赤者瀉白散主之五之氣少陽相火司令其病溫法當清解

梔子豆豉湯

治風寒入胸。胸中痞塞煩滿者。

黑山梔錢半

淡豆豉三錢

氣虛者加甘草錢半。嘔者加生薑三片。

杏朴芩連湯方

杏泥三錢

川朴一錢

酒芩八分

川連一錢

陳皮一錢

蘇子八分

川貝二錢

甘草一錢

藈白散方

桑皮一錢

地骨皮二錢

甘草一錢

粳米一撮

已亥之紀。厥陰司天。四之氣。少陰君火司令。民病黃痺。茵陳蒿湯主之。不愈。宜猪膏髮煎。終之氣。少陽相火司令。其病溫厲。視其病之所在而清之。或以針取之。

茵陳蒿湯方

茵陳蒿六錢

酒軍二錢

黑山梔錢半

猪膏髮煎方

猪板油八兩

頭髮如雞子大三圓

右二味。同煎至頭髮已成灰無渣。頓服。

陰陽應象大論曰。冬傷於寒。春必病溫。春傷於風。夏爲飧泄。夏傷於暑。秋爲痲瘧。秋傷於濕。冬生咳嗽。

此論伏氣爲病也。伏氣者。正邪也。冬以寒爲正邪。春以風爲正邪。夏以

暑爲正邪。長夏新秋以濕爲正邪。正邪能伏。虛邪實邪微邪賊邪。皆不能伏也。六氣傷人。合於四時。祇論風寒暑濕。而不及燥火。何也。以燥火二氣不能伏。故燥爲秋之正邪。而置之不論。喻嘉言未明經旨。爲補秋燥一條。不知燥傷肺金。其病即發爲燥咳。不能伏至冬令而後效嗽也。謹按燥氣有二。有火燥。有寒燥。火燥傷人。其氣不能伏。寒燥傷人。結爲癰疽。爲疝氣。日久不愈。亦伏氣病也。嘉言欲補秋燥一條。當言疝疽。不當言咳嗽也。

金匱真言論曰。夫精者。身之本也。故藏於精者。春不病溫。

此論溫病由於傷陰。陰精不足。陽氣不能潛藏。故冬不藏精。春必病溫。藏精者。陰精常足。陽精得以潛藏也。陽精爲人身之本。人身有陽氣則生。無陽氣則死。冬令陰精常足。陽氣內藏。不爲寒傷。至春則生氣外發。皮膚壯實。肌肉堅強。雖有客氣邪風。勿能害也。故藏於精者。春不病溫。由此觀之。溫病之源。皆由於冬不藏精。陽氣不藏。陰精先已虧損。治溫病者。慎勿誤汗誤下以傷陰。則治法明矣。

熱病論篇曰。凡病傷寒而成溫者。先夏至日者爲病溫。後夏至日者爲病暑。暑當與汗皆出勿止。

此論伏氣溫病發於春。至夏至日止。夏至後。地氣外發。草木皆榮。枝葉流膏。天氣熱至。則暑病生焉。凡病傷寒而成溫者。或爲溫病。或爲熱病。皆先夏至日發也。經云重陰必陽。重陽必陰。故冬傷於寒。春必病溫。溫

盛爲熱。則病熱。不能病暑。暑者。客氣病也。上熱下濕。發而爲暑。人受之。則病暑。故曰。後夏至日者。爲病暑。暑邪傷人。病由表入。當從表解。故曰。暑當與汗皆出。勿止。

謹按。伏寒發於春。至夏至日止。伏暑發於秋。至冬至日止。

論病診尺篇曰。尺膚熱甚。脉盛燥者。病溫也。其脉盛而滑者。病且出也。

此論伏氣溫病。寒已化熱也。熱極傷絡。故尺膚熱。熱甚者。其熱甚於他處也。脉盛燥者。脉大且數也。伏氣溫病發於春。其邪由筋骨出走肌肉。則化熱。故脈數。由肌肉外達皮膚。則衛氣盛而脈浮滑。故曰。其脈盛而滑者。病且出也。

謹按。溫病外達。則病當解。不解。卽爲熱病矣。

平人氣象論曰。人一呼脈三動。一吸脉三動而躁。尺熱曰病溫。尺不熱。脉滑曰病風。尺濇曰痺。

此論伏氣溫病。與風溫不同也。平人脉一呼當再動。一吸亦當再動。爲平。一呼三動。一吸三動者。數也。數則爲熱。其脉躁。其人身必熱。數又爲虛。其脉不躁。其人身微熱。或竟無熱。此虛極之候也。診脉須調尺膚。尺膚熱而脉躁甚。故知其爲伏氣溫病也。若尺膚不熱而脉滑數者。風從火化。爲風溫也。其人當發熱汗出。尺膚濇。邪傷血絡也。血絡不通。故痺。有寒痺。有風痺。有濕痺。有血痺。脉痺。骨痺。皮痺。肉痺。攷之內經。自知。謹按身無熱。脉滑而尺膚濇者。爲風痺。